



焦太史編輯國朝獻徵錄卷之一百二目錄

雲南

布政使

潘原明

應履平

袁愷

徐瓚

王俊民

黃昭道

陳善

叅政

楊鐸子璠附

黃皞

朱應登

陳觀

李渭

叅議

趙忠

按察

劉鈺

張翥

張憲臣

副使

徐觀

陳政

陳騏

朱文

賀元忠

孫繼芳

申綸

楊逢春

曹逵

楊道亨

僉事

邠玉

林淮

林希元

張澤

經歷

劉遠先

知府

杜崇

朱繼祖

龐嵩

鄭溥

戴鰲

王好學

劉容

齊柯

同知

彭鏡初

知州

高斗南

譚讓

林挺春

潘絲

知縣

虎臣

賀朝用

教授

周奕

山陰張汝霖

全校

吳興茅元儀

錢塘徐象樞 梓行

目錄畢

欽定四庫全書

卷之二 目錄

三

焦太史編輯國朝獻徵錄卷之一百二

雲南

布政使

署雲南布政司潘原明傳

黃金

潘原明揚之泰州人初與偽吳張士誠俱起鹽徒元兵圍高郵士誠與十八人突圍出走原明及李伯昇呂琛等與焉後仕士誠為浙江行省平章守杭州歲丙午十一月右丞李文忠師至錢塘原明遣員外郎方彝詣軍門納款文忠問之對曰天兵如雷霆當者無不齏粉百萬生民聞之莫不震懼及聞將軍布德

勞來雞犬弗驚皆曰王者之師也以民情如此天意可知不如乞降有更生之望文忠遣歸明日原明即以款狀來曰嬰城固守乃受任之當為歸款救民亦濟時之急務竊伏自念起身草野叨位省樞非心慕乎榮華乃志存于康定豈意邦國殄瘁王師見加意事雖晉于見幾民實同于歸義念是邦生靈百餘萬比年物故十二三今既入於職方欲溥覃於天澤謹將杭州土地人民及諸司軍馬錢糧之數以獻并執叛將蔣英劉震出降凡得兵三萬糧二十一萬馬六百疋 上以原明全城歸降民不受戮授行省平章其官屬皆仍守舊職士誠由是勢孤以至于亡洪武三年既封功臣 上于原明欲優待之命食其祿不署事子孫世襲指揮同知十一年定省臺等官歲祿之數原明每歲給七百五十石于官田內取之十四年大兵平雲南擇名臣重望者鎮其地以原明署布政使司事與梅思祖同心撫輯民夷安之十五年十一月卒樞還賜葬鍾山之陽

雲南左布政使應履平傳

履平浙江奉化縣人由進士歷任德化知縣稽勲郎中獻河清賦陞德安知府秩滿陞貴州按察使正統中奉勅同尚書王驥平麓川苗寇進雲南左布政使尋乞致仕為人剛直不阿所至祛除奸蠹民多便之且嘗論列時政多見采納

雲南左布政使袁愷傳

袁愷字舜舉其先安丘人占籍華亭愷少貧獨學時
出事賈販不為人知年二十七始棄去厲志讀書入
府學為弟子員教官以其晚學易之愷自若也未幾
擢進士授刑部主事推總三法司事陞江西按察僉
事改廣東所至有聲人始奇之江西賊圍西貴縣長
洲村愷率兵往捕時賊勢方熾或請宜少退愷下馬
令曰吾在此汝何敢不力叱使進攻克之巡撫葉文
莊知其才委起調狼兵兵懾不敢肆又率偏師駐全
洲督軍餉贊畫梧州總府多所裨益都御史韓雍征

大藤峽愷躬擐甲冒矢石以從時皆壯之賊平錄
功有寶鈔文綺之賜擢廣東按察使進右布政使遷
雲南左布政使未至卒愷居官廉不為身謀出仕三
十年家無餘積卒之日橐中蕭然在鄉里任真履素
不以勢位自居出入乘扁舟從一二蒼頭見者不知
其貴人也時以此高之子珮孫讚皆以能書授中書
舍人直文華殿

雲南左布政使徐公瓚傳

徐瓚字朝儀浙江永康人嘉靖間任按察使丁亥冬
土舍安銓叛雲南久安忘備報至上下咸以為憂公
曰醜虜敢行稱亂者謂我軍非其敵耳今以夷攻夷
成擒有日矣總鎮撫按諸公知公才識凡有所圖悉
以諮公乃議調元江蒙化鎮沅等處夷兵佐以漢軍
呈委諸僚分統進勦已獨留中議處糧餉閱習招募
事皆立具晝夜登城狗師至廢寢食於是計立招降
大旗陰誘脇從仍造小旗千餘大書同心協力各保
身家八字于上令各聚執聽撫綏是歸降交至賊勢

日衰時疫寒民多凍餒公復捐俸為粥食之仍請撫
臣大發倉廩全活者以億萬計戊子春土舍鳳朝文
繼叛與安銓合焚劫屠掠兇威益熾遂進圍省城將
肆焚戮上下震恐公登垣呼寇諭以朝廷恩威竟以
大義寇皆伏地請降且以復官為言公諭令退舍俟
命寇遂麾衆而退公即夕走使掣回各哨官軍厥明
合擊賊遂敗潰公仍議督僚長驅直捷而還獨渠魁
逃迸未獲分別設方略卒擒而弭之人更稱功俘獲
賊屬萬餘簡審無辜悉為開釋民深德焉家為立祠
巡撫歐陽公重疏公籌策無遺功勞獨著保境庇民
繫人心於全省撫降訊醜廣帝德之好生六月擢本
藩右布政使八月進左布政是皆以公資深序進而
論功之賞則猶未及也

雲南左布政使王公俊民墓誌銘

王公諱俊民字用章號南湖其先石首人始祖勝友
生添禮添禮生聰四川廣安州州判始徙荊州府城
家焉聰生翔東阿驛驛丞配楊氏實生公初公就學
機神警郎書初讀輒能舉其要治易善屬文迥然出
諸生中正德丁卯中湖廣鄉試甲戌登進士第銓授
蒲州知州公下車課農桑緩刑罰修學宮甫三載而
士民德之州用大治當路者交章旌保擢大名府同
知當行民遮道留不獲爭脫其履以去并肖像事之
大名境廣政劇公才敏而勤時任都憲原孝為守後

王郡即自慶得賢貳身倚重焉凡重務鉅獄必以托公公一一裁決有巨璫家故居城中怙勢侵古人地宅公一切奪還之又勾考戎籍無隱弊郡人稱平撫按表其治行于朝居無幾陞福建僉事兵備汀漳汀漳道連三省多盜且每訟必牽引數十人經年不結公至即理滯平寃庭無留案時閩中叛卒糾平民為漳南巨患公設策分布民兵往捕并其黨禽之地方獲安秩滿擢廣東左叅議時田州土官岑猛煽亂朝廷命出師公冒險觸瘴督糧餉以給軍士賊平撫按上其功賜綵幣楮錙者再時以入賀 萬壽至京

轉山西副使後改福建巡海副使過家方就道楊夫人棄養為斂葬備禮服闋補河南副使兵備大名大名舊治士民間其至驩甚比至諏訪民瘼飭再嚴兵伍如在漳南時未幾轉廣西右叅政尋陞廣東按察使乃慎刑汰幣姦罔所宿名赫赫起轉本省右布政益展心力得丞宣體會鄉試諸生提調科場井井有條甲午冬入覲京師先是部使者欲誣入人罪公與論齟齬部使者銜之竟為陰中乃調公雲南公至清案牘勤聽斷羣吏斂手會有詔徵滇產黃金丹青甚亟公移文督派恐民受擾每就中必為寬假雖見忤

使者不顧安南搆亂時議欲討平之乃區畫兵食日
懷隱憂會有驅兵民轉餉者地方洶洶自危一日閱
士轅門軍衆鼓譟露刃欲為變羣相視錯愕莫知所
為公除呼使前諭以利害皆感泣聽命母敢譁者而
亂隨以定時方賴其有為忽遘疾弗起時嘉靖戊戌
四月十有三日也公平生恥奔逐初第坐其姊為宗
人妻得外補其實姊氏逝久且乏嗣制得無碍公一
無所陳請或問之公曰某若是是于進也竟不聽後
雲南巡撫官疏其事為請奏可覆勘且至當道擬將
柄用而公逝矣 亮直練習文法蒞政詳謹雖事端
棼錯從容應之皆中肯綮事集又不矜功伐處僚友
恭矣所在交承稱不絕口及聞公計慨歎至有泣下
者雖久官家無他贏論者謂為廉介君子云

雲南左布政使黃公昭道傳

胡直

黃昭道字文顯平江人生有異質出就外傳疑重不與羣兒伍人奇之登弘治己未進士筮仕山東長山令其民悍梗素號難治昭道下車盡心按戢鋤剔其蠹弊拊摩其凋瘵政令一新豪猾斂避歲大蝗愈捕愈熾昭道憂之默禱於神曰欲下蝗必得雹去蝗必得雨俄而雨雹交作蝗亦隨滅人以為異宋范文正公幼讀書長白山昭道為建祠祀之終三載銓司以昭道賢能徵為南京陝西道監察御史時逆璫瑾等擅權號稱八黨昭道上章論劾引趙高仇士良為戒

瑾怒勅下南京守備官杖三十除名久而積血于踵
遂成跛躄庚午瑾伏誅癸酉擢廣西按察司僉事尋
丁外艱乙亥起復以舊職補江西時宸濠久蓄逆謀
招納亡命劫掠彭湖等處為地方患昭道捕獲數百
人訊讞成獄雖取怒宸濠禍出不測弗計也無何丁
內艱戊寅起復補山東踰年奉勅轉海道兵備副使
海寇不時嘯聚昭道分遣哨兵設策勦捕濱海晏然
屢蒙欽賞屬郡多冤獄歲久未決昭道悉平之全活
者衆壬午擢雲南左叅政時木邦孟密緬甸讐殺已
數十年矣先是府官往輒以人馬萬餘擁前後羣蠻

驚疑竟莫能撫僉謂昭道曰夷狄相攻乃中國之利
今撫之既弗服殺之乃弗勝計將安出昭道歎曰本
邦諸夷皆國家臣子性雖獷戾豈無人心哉若以誠
心公道處之則無不服矣何以殺為言者慚竦頃緬
甸告急昭道主議但以數騎往渠遣人篋壺以迎入
其地諭以利害待以誠信前後事情悉為處斷皆龍
服懽聲遠聞且貢方物如往歲事竣分管安晉道方
月餘尋甸報劇賊安銓欲殺守奪印甚急昭道即速
整兵兼程而進賊聞昭道至即釋守還印遁去好赴
本司右布政使尋轉本司左布政使時昭道久勞而

務先年足疾至是復作遂告病歸辛丑三月偶病索紙筆書曰老夫塵世士十四年茲以疾於三月初吉大歸中書諸官履歷及家計為詳遂成小子字壽清勁無異平時衣冠儼然而逝見者咸以為仙

雲南布政使陳公善神道碑

許孚遠

先生諱善字思敬別號敬亭世居錢塘太平里家乘始清河居士某凡四傳而至司訓公荆獻是為先生考以先生兄弟貴贈禮部員外郎加贈刑部郎中母王氏贈安人加贈宜人先生生而端凝弱不好弄年十一能屬文嘗從贈公讀書於觀察王公署中一見日為遠器十四及王文成先生之門十七試有司督學汪公置異等甫弱冠當督學林公選為五經師所造士若太保高文端公而下多賢達甲午舉浙江鄉試第二人辛丑成進士拜歛令初至屏供帳一切汰

省示民悃愾故健訟先生以至誠化導訟日簡無
何丁王宜人憂服闋補桐城時贈公司訓崑山先生
甫出都門覺心動馳抵崑贈公果疾革居三日而永
訣僉謂其孝感云已西北上應聘分校順天士兼易
詩得榜首孫公銑二十四人已補清苑清衝劇而疲
尤加意損節先是金臺驛站馬出闔郡諸州邑厥後
變為輸銀貽害清甚先生議仍前規均派爭者蝟起
會內轉力請于當塗行之而清人始蘇在禮曹興屬
國往朝鮮諸夷以貿易輦漢物歸縣官費供輸而牙
儈售苦窳為夷人病朶顏貢夷且有偽增名物窺利

者先生悉糾禁之言於宗伯華亭徐公著為例進主
客員外郎尋轉僉憲督學廣西首廸士以正學使知
根本重德行倣何仲默關中學政令誦習經書傳記
子史古文詞粵士彬彬嚮風焉未幾轉叅議駐惠潮
海寇初平瘡痍未復一務休安集境內宴如養旋轉
副憲督滇南學其型範規條無改西粵之舊載刻小
學句讀自警編忠孝歌頌教諸生遷滇右叅政督理
銀場諸言開礦利者俱報罷始先生督學時以執法
忤鎮臣且忤御史至是被誣論褫秩去已而東甌王
侍御諍破滇廉其枉力辯于朝其略謂陳善居鄉居

官人稱為古君子及任前職人稱為真提學諸所舉措實能造就人才祇以懃直忤權豪而受謗廢臣入滇聞諸鄉縉紳諸生父老言最稱冤枉亟當召用朝論避之復原官隆慶改元起山西按察副使尋轉江西左參政未匝月轉廣東按察使先生以刑獄關係民命精審讞牒洗冤剖疑累累多異政具粵臺行稿中會流賊曾一本寇廣城城門晝閉軍民扶老攜幼向城而泣先生惻然曰奈何棄數萬衆于鋒刃下為啟門躬為殿而入之賊矢幾及車蓋竟無虞轉雲南右布政使自貴入滇道崿嶇甚先生捐俸為倡闢險為夷者數十處滇人聞先生至喜甚先生亦樂撫之興利剔蠹不遺餘力黑曰鹽井久為墨吏豪家所乾沒於是釐刷一清商民稱便滇歲採上供金二千兩而滇實少產金戶業困且復增輸三千先生建議派價諸州邑市金蜀之寧番越嵩以解民得無擾六衛諸倉散歛為奸利先生詳定條例刻石永絕弊源撫臺某欲奏行戰象之法於朝先生力言西北非用象戰地象產炎徼不耐邊苦寒每市一象於土夷度費金五百而水陸萬里煩擾百端貽患匪細議得寢故事土官襲蔭黠胥多方難之索其重賄先生即與轉

聞曾無停晷嘗曰治滇以馭夷為要沅江武定之事失其心也人以為名言會武定之役兼攝洱海道事武定經鳳氏變後議更城獅山而激江城又議遷廣西嵩明兩城且新築四役竝起物力不支先生多方調度不踰時而工就復立哨建堡以峻金沙七度之防推誠布信民夷大悅昆明之旁山曰橫山山陽有田五千餘頃地高苦旱先生視白石崖有泉在上遊可引溉而為橫山所隔議欲鑿山通渠兩臺難之先生曰事在我耳即矢衆禱天焦勞經畫山前後竝興開鑿之役功久未成庚午大比提調雲南文武鄉試事辛未轉本省左布政使先生居滇三載久蓄去志而以方有事橫山淹留歲月至是決意引去遂上疏乞骸骨新鄭當國許之蠲日啟行則橫山水洞忽報開通蓋神明實有相于先生也傍山數萬家受其利因名其洞曰惠濟立祠洞旁肖公像祀之去滇之日行李蕭然縉紳爭為詩以頌冢宰嚴公清有眼前鐵漢撐天地暗裏丹心泣鬼神之句先生既歸造請盡絕自御簡素纖嗇至修築堤塘道路勞費不恡其東新塘九十餘里倡於先生而成於郡伯劉公伯縉張公振之利濟甚鉅若觀音塘黃泥慈雲二嶺皆有修

築功生平存心濟物然有差等不妄施三黨之親而
貧疎而賢者洎故舊門生之賢而貧者時有周給其
婚不能嫁死不能葬者竝給之屬歲荒傾貲市米為
賑復作糜以哺饑者民病疫施方藥給構具冬月施
絮衣掩骼埋胔不可數計戊子春形神已憊猶力疾
焚香籲天為民請命家人進梁肉輒推不食曰民糠
粃不給吾忍甘肥脆耶遇窮交淪落或故人子有急
每極力拯援桑梓利弊知無不言賴以調停者甚衆
然不令人知也先生蚤聞王文成之學遇按臺蕭公
廩督學滕公伯輪大集學徒于天真書院屬先生提
衡其中書院中廢又旋復因修復俎豆祠田為長久
計撫臺徐公栻聘修杭郡志先生倣綱目立例自漢
周迄今具為條載筆削甚嚴凡再閱歲而志成然精
力自是耗矣先生林居垂二十年臺省薦無虛歲太
宰張公瀚嘗以先生及雲間莫公如忠吳門袁公洪
愈三賢比諸商彝周鼎江陵目為迂濶不用晚入張
太宰諸耆英怡老會季公貞亭少師事先生及歸林
泉杖屨相屬鄉邦尤稱羨焉先生信古好禮冠婚喪
祭母苟徇流俗忌辰縞衣蔬食哀慕終身閨門肅穆
旁無媵侍與其配俞安人相敬如賓俞歿蕭然獨處

恒竟日端坐諸子進見拱立於旁有問則對無敢輕發一語者器具朴陋不愛華飾見人服食靡麗輒目攝之至有竄服以見者每晨興整冠服坐庭中令子婦諸孫次第相見時有訓戒語家僮無小大蚤暮出入儲察必嚴不令其一時放蕩於外也已丑冬一瘠甚然無他疾曉起猶巾櫛如常勉諸子孫以立志遠大親正人等語夜呼季公來訣奄忽長逝可謂正命考終矣享年七十有六所著有粵臺行稿二卷黔南類編八卷黑白鹽井事宜六衛倉條革二卷杭州府志一百卷勲賢祠志四卷族譜二編家藏稿五十卷

雲南叅政楊公鐸傳子璉附

祥符文獻志

公諱鐸字文振陝之朝邑人元季兵亂其四世祖德亨東遷河南之原武祖旺隱德弗輝至父智以公貴封僉事生六子公其長幼入邑也庠明春秋宣德壬子中河南鄉試魁次年會試登曹鼎榜進士觀政刑部正統元年奉勅前往陝西纂修宣宗皇帝實錄次年三月除授大理寺左評事詳讞平恕公勤之譽茂著當時正統乙丑陞授陝西按察司僉事廉能以持己嚴明以臨政時遇按察使總治司政多尚寬平奸宄之徒肆為佞辭皆得踈放公知為奸佞所欺必

法言以正之由是輿論稱快聲價益著景泰甲戌復陞陝西布政司右叅政督延綏甘肅等處軍儲益勤乃心益公乃政邊事益寧軍民悅服天順壬午丁內艱服闋服除貴州叅政通前九年滿考夷獠不捨其去合疏保留陞食從二品俸照舊管事成化丁亥丁外艱還鄉聞友人宋克新謫官東阿與妻子俱喪不能歸葬公乃出備路貲遣人自東阿取三喪歸葬之鄉人稱羨公之存心多類此服闋復除雲南左叅政蒞任未幾引年乞致仕還僑寓返城日與士大夫優游詩酒鄉社之間歌詠吟嘯微醺輒曰舒懷嘯詠而不拘拘也公初配梁氏贈宜人繼配趙氏俱先卒繼配孫氏亦封宜人子六曰瓚鄉貢進士曰璿弘治庚戌進士觀政兵部

子璿字廷佩別號靜軒其先陝西朝邑望仙里人高祖德亨博學好古元末避亂攜家東徙開封遂占籍原武祖智封按察司僉事父鐸舉進士歷官雲南叅政致仕歸以河患復遷居大梁公甫弱冠提學陳公遜見而異之曰吾禮經有傳非子不可遂受焉成化丁酉舉于鄉錄其經義一為式屢試春官不第且親老家貧諸兄相繼沒公及服田力穡以養其親暇日

從事問學至弘治庚戌登進士辛亥丁外艱服闋授
兵部武庫司主事改武選司辛酉陞車駕司員外郎
奉命同御史某汰京衛軍得避匿者萬人歸伍且上
章劾私役者 上嘉納之爰著為例乙丑陞武選司
郎中奏行公蔭襲嚴比試諸條大司馬深器重之正
德丁卯銓部以廬州乏守擢公為知府公至則壹以
廉正御之郡有疑獄歲久不決公親推勘得生者六
人郡太疫公請禱徧給醫藥活之它若敦禮士夫教
課農桑得古循良之體庚午陞長蘆都轉運鹽使司
運使署設滄州近京師商旅多豪右然鹽場有遠邇

美惡公場置一籌納竹筒中令各商以次出之豪右
不便公曰吾革弊耳權貴何卹焉由是鹽法大行壬
申劇賊劉六等攻滄州急州吏失守公督州民諭以
大義登城守之且伺間發矢遂斃賊首乃解去當道
以聞 上賜旌獎是年冬滄州內變殺吏民劫倉庫
公倉卒率市民力破而逐之先是有馬指揮者與公
善出白金二錠寄焉變後公袍笏罄然惟馬金因投
破篋中獨完左右欲私之公叱之曰是何言安作此
喪吾所守癸酉公年逾六十上章求退者三而銓部
方錄公賢勞進階以請得旨陞山東右叅政致仕公

優游林下十有三年丙戌歲卒壽七十五公性剛直
善談論古今非其道義不肯取與人厯官中外循循
簡朴澹無所好歸田閉門靜坐飲酒彈琴無所干於
人而人亦不敢干以私其若世之人逢達履窮蚤營
夜計以惟日不足自黃童至白叟形神勞役若將為
得者豈不悲哉 副使田汝耕墓志

雲南左叅政黃公皞墓碑

黃 哀

郎溪之黃六大宗中派自汴梁宋靖康之季避亂南
海是為郎溪之始公諱皞字時雍操坡其別號也曾
大父宗善沈毅有略後山之亂以計干主將脫良民
於兵者數千人 大父慶父超贈奉直大夫吏部驗封
貢外郎妣鍾贈宜人公生雋爽弱不好弄嘗坐曹役
羣兒若官府者長老目之曰黃家偉器也甫及志學
蘄然出師右年二十六領成化乙酉鄉薦卒業太學
益博綜羣籍以書授徒凡得其旨要者卒為名士然
屢屈於禮闈始謁選天曹太宰置其文第一授吏部

司務陞司封員外郎時東廠權跋特盛曹署請謁必
踞歲暮饋厯公次當任比見長揖而已總兵沐崑請
嗣黔國公公按其世宜襲西平侯執奏至在朝廷以
舊恩遠鎮特與世公爵故事子通朝籍父為外小吏
雖以罪廢尤冒馳封公奏革之由是士人始知恩典
之重尋拜江西左叅議奉制督儲入辭冢宰屠公屠
曰江西大藩錢穀弊集是以付卿公對曰往服厥官
安敢不力如後有謂皞才智弗給即皆可信若謂其
貪幸見察耳屠曰嘻豈有是哉至則摧豪惠良去業
蠹如振秋稿郡縣糧目素繁且襍為元若負不稽簿
領肆口指陳無一棼謬又鈔通算法日量贏縮不假
籌計奸吏屏伏糧政大修寧庶人蓄異志禮多僭擬
口僚朝見類贊叩頭公伏不動俟贊畢而興識者以
為得體祿米折價溢數而橫取公執不可庶人大怒
遣儀賓李某動以危言曰殿下且奏奏下即布政通
判輩斬矣公徐曰第斬吾一人足矣何冤彼邪其議
竟沮至如辯豪僧之誣訟遏兌運之侵暴上下躡焉
居八年撫臺林公見素薦之巡察若喬若周若王薦
之以無內援未果遷值逆瑾亂政裁奉制官公在裁
列士民攀泣見欲疏乞留公輕舟徑去既而江西糧

務日弊朝議以舊職起公復領其事未至擢雲南左
叅政所管納樓茶甸長官死妻沙福代與夫弟普顯
治兵相攻積數年死者甚衆撫鎮屢遣屬僚撫諭竟
莫能平公曰非藩臬重職恐未有濟乃偕僉司都閫
以往比至境福顯皆盛兵自備公若不聞也者據館
即召二渠反覆詰讓盡得其情乃執通把數輩將撻
之操兵者望風奔潰公度其已困釋之曰日暮且休
矣遲明俱來吾有戒約詰旦二渠皆束身伏庭下聽
命去居數月福等各行千金求變初約且曰已告夫
二子者公曰吾即受此緣此死者又不知幾千百人

吾雖貧以老如子孫何謀者乃寢竟弭其亂初安南
長官那代攻破蒙自虜其令祿卿之族負固垂二紀
歷數守巡母敢議者公至則濬塹增陣調餼練兵建
旗鼓申號令若將征之者代懼請歸祿卿之妻若其
屬口乞緩師以圖新由是威震六昭璫崔安附瑾作
威且忌公功語次微有譏犯公盛氣力辯聲色俱厲
安乃媿屈連呼鐵漢吏民因稱鐵漢公云比致仕垂
橐而歸觀者泣歎謂三原公後無此廉節也公雅善
吟詠晚年屏居詩益雋永遺稿藏于家正德壬申孟
冬四月卒享年七十有三

參政朱凌溪先生應登墓志銘 李夢陽

凌溪先生朱氏名應登字升之揚之寶應人也生而
犖竒童時即解聲律諳詞章十五盡通經史百家言
其父江陵公者異之然懼其踰也約之古凌谿悟乃
著申臆賦以見志而力殫于淵學於是飫醇探鑿程
猷經用噴英搗華樹聲藝林矣年二十舉進士時顧
華玉璘劉元瑞麟徐昌毅楨卿號江東三才凌谿乃
與竝奮競騁吳楚之間歛為俊國一時篤古之士爭
慕嚮臻樂與之交而執政者顧不之喜惡抑之
樸恥乏黼黻以經學自文曰後生不務實即詩到李

杜亦酒徒耳而柄文者承弊襲常方工雕淨華靡麗
之詞取媚時眼見凌谿等古文詞愈惡抑之曰是賣
平天冠者於是凡號稱文學士率不獲列于清銜乃
凌谿則拜南京戶部主事陰欲困之凌谿刺焚斷錯
乃顧亨于官而其學愈淵居無何陞延平知府意州
郡吏必難乃凌谿為之愈益亨乃於是陞陝西按察
副使使提學凌谿闢正學院羣秦士高等其中置官
設徒豐饒嚴約談經講道至者且數千指風教大行
文自韓歐來學者無所師承迷昧顯則我明既興隆
本雖切然要奧未聞也及凌谿等出創覩駭疑大不
容於人人各以所不勝相壓而凌谿性挺直不解假
詞色於人更哆憎口恨不即寘之幸例調荒裔往禦
禦魅尋陞叅政卒罷去凌谿歸潛伏草莽中溫繹前
業期十年盡償所願而今亡矣噫嗟嗟悲乎人忌之
天亦忌之邪夫蛾眉胎禍才美殃毀順往逆來孰非
爾者然英人志士每甘心窮約而不悔者徒以人者
難必而天者足恃也十年之內徐何載淪凌谿胥歿
天實忌之矣人何尤哉噫嗟嗟悲乎凌谿生成
化十三年正月己未得年五十醫旨曰先當後貧病
後內生言淺狹之易折也凌谿廓落易直憎口日哆

而聽之如蒼蠅過耳斯其量可與僊僊心心者道哉
退研精肫推訂律歷運數讐史質經底詮名實流覽
古今橫睨宇宙視軒駟直芻狗耳大命中奪齋志長
畢非天忌之而誰忌邪卒之日適邑官來謁揖讓而
氣絕斯病内生之否邪噫嗟嗟悲乎悲乎凌谿他所
奇節隱行與凡履歷宦業忠孝友義言動細小莫之
具述第述其生死大槩闕運數者如此

雲南布政使司左叅政陳君觀墓志銘

張時徹

君姓陳氏名觀字忠甫其先南朝之裔世居餘姚開
原鄉宋有諱昇者嘗率鄉兵禦睦寇授武功大夫京
畿都統領子廷俊復率鄉兵禦金人境內賴焉高祖
諱孟雍贈吏部文選司郎中曾祖諱雷封河南彰德
府同知贈湖廣布政使司左叅政祖諱廷敬直隸薊
州判官贈工部營繕司主事加贈廣西布政使司左
叅議湖廣布政使司左叅政父諱煥光祿寺卿母胡
氏封淑人君為光祿公第四子正德癸酉光祿公舉

於鄉捷書至而君生自幼秀穎不羣束髮從其族兄湖廣右叅政塏授大小戴氏禮輒能了其義為文溫夷爾雅年十六補縣官弟子已復為國子生辛丑仲氏太守墀叔氏少宗伯陞同舉於春官君益自奮厲折節讀古人書顧連蹇不得志於有司庚戌居光祿公憂戊午捷順天鄉試己未再捷春官拜兵部武選司主事尋陞車駕司員外郎再陞郎中佐大司馬樞機肅清軍府人無敢干以私者甲子轉武選司郎中凡天下武臣承襲者咸隸焉吏每竊柄舞文紈袴子皆入賄夤緣為姦選舉往往多濫君一以至公振刷

之邪蠹屏息三月居母淑人憂丙寅服闋復補武舉司郎中風裁益厲兩典武會舉一考天下都司家豪雄帥領多所識拔累官郎署練達機宜材識卓詣大司馬虞坡楊公大器異之戊辰兵備湖廣衛永郴桂諸郡蓋朝廷以君夙望故以全楚要害付君君馬首南也輒銳志經略會新寧猺人寇掠江廣詔下命君討之君以兵餉方不足而與蠻夷從事邊鄙重傷元元之命乃遣使者招撫諭以威信猺人面縛降轅門願受朝廷約束誓無敢復反者廣東賊黃潮祖等流劫郴州桂陽君督兵擊之斬獲虜首以百計招降餘

黨悉平廣西賊韋銀豹韋大駕樓船泝衡永江大掠諸郡君又督兵殲之江上時兩廣征古田猺獞軍門檄君為備乃君大振兵以張軍威聲聞八桂蒼梧間虜為褫魄彼省克奏首功猺人既平則給土田立堡巖修城垣募勇敢足軍糧興學校明教化凡士風吏治民務戎機靡弗經營蓋為朝廷保障一方樹長久之畫非苟偷旦夕安也而君之神用亦竭矣初陳公士賢有惠政於衡永間衡永人立祠祀之至是以君配祀謂之兩陳公祠云平未人賀竟先帝萬壽節報政於朝先已陞君雲南左叅政而以勅勞楚事積苦疾作卒於京師旅舍時壬申三月初九日也虞坡揚公撫而哭之出涕曰使君須吏無死即鄉丞何足道哉乃給驛遣官扈具喪歸故里

參知李公渭傳

澹園集

歲癸亥余師天臺耿先生董南畿學同野李公從之遊余乃獲交公及公歎歷中外相去萬里不忘以學相商證而今已矣是不可使無傳乃為作傳公諱渭字湜之學者稱同野先生上世自吉水遷思南父諱富累贈中憲大夫母張累贈恭人公生而朗然玉立眉目如刻畫十三補郡學弟子員十五病居小樓當盛夏箕踞而處中憲公以無不敬飭之公廩然書諸箕居日如妄念何中憲公又以思無邪飭之復書諸牖久之靜默中恍若有得者及與客笑談前境隨失

因自疑曰有得有失非本心也自是公之求心者日切嘗謂伊尹堯舜君民自一介不取始故弱冠登賢書於交際甚嚴舉似道林蔣公蔣曰靜假動真問一介不取蔣曰硜硜然小人哉公聞之愧甚不覺汗之浹於背矣入留都耿先生以宦業相知已進而語學有深省遂就弟子列及耿先生以宦業相知已進先生弟子庸共論亟稱明道識仁語子庸不答也俄疾呼同野在否公應曰在子庸曰同野在乃從明道誠仁公為之灑然最後與近溪羅公為寮互相叅證其學益邃嘗曰孔子毋意孟子不學不慮程子不着纖

毫人力皆非從安排得來知毋意即千思萬慮皆毋意也知無纖毫人力即已百已千實無纖毫人力也學是學此不學慮是慮此不慮而已又語門人曰浮雲人間作雨天上常清常明狂風江中作浪流水不增不減知得常清常明不增不減者可與言學矣一日讀學道愛人語謂人曰道不明則仁體裂天地閉惟是念念在民令同歸藹然一體中吾之願也故廻翔郡邑二十載所至精心為縣官牧小民大指率歸於此初令華陽為鋤奸弊捫流移不得甘食息知和州興學校抑吏胥歲省浮費數千金鄰滯縣獄待公

而決遷高州府同知至則謁甘泉湛先生修復書院
教授諸生亶亶不倦而以其間飭武事為不虞備西
賊來攻公率所部授甲置陣為三覆以待賊竟引去
時方變里甲為均輸公劑其多寡官為主辦放民歸
農至今著為絜令嘗夜夢巨蛇印身者三揮杖擊之
詰朝合浦吏以美珠進化州吳川吏各以兼金進公
斥去不顧笑曰金珠非寶固吾人蛇蝎哉晉應天府
治中南戶部貲外郎再轉工部郎中出知韶州府先
是韶有二源之役百姓苦之甚多去為盜公集寮屬
諭曰夫子告康子以不欲弭盜之本也倘身為溝壑

是我為盜竿而何以責之民乎弭山中盜易弭心中
盜難諸君勉之聞者悚息居韶治最當遷而韶民以
借寇請韶進服俸知郡事如故再入覲時 穆廟宴
天下守令卓異者七人旌之幣鈔公與焉還韶晉其
省副使平惠潮討朱良寶克成厥功恩賚加等經略
惠潮水寨更置守巡建清遠邑治開驛從峽中東山
達英德以通東粵皆公本謀也晉雲南左叅政濬松
溪水灌田萬餘頃城晉寧安寧二州以翼金碧時滇
用兵久疫癘大作則為藥與糜食貧民所活無算死
無裨者官給之至八百有奇往土官襲替當事者目

為奇貨留數歲不遣公建議輸粟藩省代 奏授官
部使者上其議土司萬口頌之矣在滇四載謝事歸
篋中圖書數卷無長物也四方負笈從遊者衆構朋
來樓居之日惟明道作人為務居恒事父中憲公蒸
蒸敦謹卒柴毀支骨母張恭人病暴已罪狀籲於天
乞減算以代建宗祠聯族屬念俗日敝力持古禮以
先之常言居官不廉從糜費始於儉德三致意焉時
多有興起者戊子疾作猶日與門人論學至革進諸
弟子訣惟以學為規言不及私既卒士民奔哭者累
月四方同志或為位或為文哭之不可勝紀公自言

於學入白下見耿師與居和高時不同過楚登天臺
又覺與白下不同與近溪游月巖復覺有不同者如
登九級浮屠隨步而異所謂未見其止者非歟所著
先行錄答問三卷母意篇合大學中庸易問為一卷
簡寄二卷雜著一卷詩一卷文一卷統十卷又著家
乘十二卷藏於家大儒治規三卷行於世先後按部
使者採鄉評祀省會及郡學鄉賢祠又從諸生請郡
建特祠祀之生正德癸酉十二月卒萬曆戊子四月
享年七十有六諸子姓彬彬秀文而廷謙世其學尤
著載耿少司馬志中不具論

論曰夫範金為鼎貴重矣一旦入用以烹飪飽炙曾不若釜鬻之為便何者其文勝也而適用非也晚宋儒者握拂矩步自以無前而不能當於用往往為姍笑者之口實叅知公在所有循良聲蓋學以本政政以徵學即謂淵騫冉季兼數器而有之奚不可者善乎參知之推言之也曰吾之知學自耿先生始詩曰豈弟君子遐不作人耿先生之謂也

朝請大夫雲南布政使司右叅議趙君忠墓志

銘

馬忠錫

君諱忠姓趙氏行恕其字也其先宋宗室福王與為六代孫繇汴遷越再徙蘇遂為蘇之長洲人高祖諱孟桂元中奉大夫檢校大司農平原郡公曾祖諱由瑤濰州知州祖諱宜濬隱德弗仕父諱學禮樂善好施鄉稱長者以子貴贈文林郎河南道監察御史母陳氏封太孺人行恕自幼秀穎端重異於常兒稍長氣岸魁梧楚楚如老成人父遂遣入邑庠為弟子員問學講習窮晝夜不少間學成遂以宣德己酉領京

闡鄉薦庚戌登進士第觀政內臺踰年擢河南道監察御史文林郎明法御達憲體慨然有澄清天下之志而哀矜慎恤恒存於心時鄉先輩陳僖敏公掌臺事振厲風紀御史中非卓卓者雖鄉舊不少假辭色而獨禮重行恕正統己未奉命按四川所至鋤強激貪問民疾苦而興革之境內清肅未幾有司報松寨商巴棘麻國皆叛君即奮勇率兵入其巢震以風威諭以禍福其黨衆悉潰既而廉得其實乃統兵者激變所致遂劾其罪罪之朝廷遣使賜寶鈔酒幣將吏懾服番民向化邊境以寧辛酉奉勅巡浙江海道

早夜盡心撫士卒飭兵備繕城堡嚴斥堠卒無意外之虞壬戌歲朝廷簡能御史清理天下軍政廷臣僉議舉行恕乃拜壘書之廣東督勵所司期以實效雖蠻鄉瘴海無不躬履其地不踰年軍士肅清民不告擾一時為御史者皆自以為莫及未幾朝廷以陝右鉅藩嚴方岳之選遂擢行恕右叅議行恕右叅議吏治恤民隱陝之人無老稚賢不肖皆愛戴敬服尋以舊官復任改雲南左叅政因構疾還鄉調治遂不起距其生永樂甲申享年五十有六行恕平生操履端謹財出非義者一介不苟取故久歷仕途囊無餘貲

還鄉鄉之居室族子弟以窶而售之人矣行恕携家累子子然無所於歸其友朱名仲憫焉乃假餘屋以居之既卒其喪不能舉名仲復偕其友徐文輝輩倡助以襄厥事為文章典重和厚詞理精到詩好唐人每風晨月夕撫景感懷必見諸賦詠長篇短章清新典雅足追古作云

雲南按察使劉公鈺墓表

何喬新

成化十有四年春雲南按察使劉公仗和帥其屬入覲懇求謝事吏部以聞 憲宗皇帝特允其請公歸徜徉林泉者七年以疾卒于家享年六十有四諱鈺仗和其字也其先本長沙定王之裔王之子蒼別封安成侯安成即今吉之安福也至其孫壽光以罪國除因家于邑之茨溪祚亂蕃衍歷唐宋以至元代有顯者曾祖諱子定別號新齋始徙家邑之葛溪祖諱伯文別號文園贈禮部儀制司主事考諱球由進士累官翰林院侍講上疏掎權奸歿于制獄贈翰林院

學士謚忠愍母鄧氏累贈太宜人公自幼穎敏過人忠愍躬教之時姚文敏公學于忠愍公之門公與之上下議論文敏每歎服之稍長從學于禮部侍郎李公克述學益大進會忠愍以諫受禍公哀痛毀瘠幾不能生服閱讀書養母無復仕進意 景皇帝即位臺諫言忠愍之寃詔贈官賜謚且祀于郡之忠節祠刑部侍郎楊公彥謚巡撫江西召公語之曰而翁忠節已獲昭雪子可以仕矣公乃赴江右省試以春秋魁多士甲戌登進士第改翰林庶吉士預修寰宇通志書成賜楮幣文綺擢廣東道監察御史未幾出巡

福建畿郡遼東于時同官者務擊搏以峙聲威公獨慎憲度理寃獄察吏治巡歷所至訪民利病而興除之不求赫赫名人皆以為得憲體真定有嫠婦不安其室其族長恥之合羣從毆殺之有司坐以謀殺當死者七人公曰此羞惡之心也何可深罪具以上請遂皆免死福建都指揮僉事錢輅與其長劉姓者有隙劉密白鎮守中官誣以罪乘夜以兵圍其第輅覺而逃中官遽以輅反聞廷議遣官會公覈其事輅亦詣公自首公具奏輅懼罪而逃非反也輅得釋每語人曰微劉御史吾族夷矣汀州豪民欲奪隣之墳地

以葬其親鄰不與豪怒言于朝云其地當出帝王
英宗遣中貴人會公驗之公曰八閩遐且僻寧有帝
王地邪寘妄言者于法既還臺同官以私忿欲劾大
臣且誣以閨門之私以章示公公曰言事當顧大體
奈何以曖昧之事汙鱣大臣其人慚而削之天順甲
申陞浙江按察司副使奉璽書提督學校公至則明
教條嚴考較進茂良黜惰窳繇是兩浙文風丕振擢
倫魁登膺仕者彬彬焉成化辛卯遷按察使或疑公
優於文學法律非所長及見公決獄曲當其情乃大
服尋丁太宜人憂去服闋改雲南按察使雲南荒服
之地外與哀牢交趾接公因俗為治寬其禁令馴以
恩信蠻獷畏而懷之及公歸羣夷皆大息曰是善撫
我者何懼去耶公性孝友忠愍公歿事太宜人以孝
稱與兄叅政仗德友愛尤篤接人一以誠意而世所
謂機變之巧若無聞者居官盡職分未嘗銜能矜名
以求人知而當道亦無能知之者故其官止于此

雲南按察使張公翥墓志銘

王鏊

雲南按察司按察使張公諱翥字汝振世為蘇之長洲人曾祖諱進浙江諸暨知縣祖諱滄國初以人才徵未用卒考諱樞贈奉政大夫南京刑部郎中妣陸氏封太宜人公登天順丁丑進士授工部都水司主事改虞衡司又改南京刑部山東司歷員外郎郎中出知江西南昌府進河南布政司右叅政雲南按察使致仕以子約貴進階正議大夫勲資治尹 今上登極以詔恩進中奉大夫正德丙寅冬十月二十九日卒於家春秋七十有七配吳氏累封淑人子男二

長約工部營繕司郎中公清慎守法矚然若不自持
而見義卓然不惑始至南昌即理冤獄出之民大悅
高安有毛姓世豪於鄉縱火殺人亡命吏不敢問公
發之竟置重典民又大悚有中貴乘傳搜括民間奇
玩勢張甚郡縣望風迎拜且以鹽抑配於民而以庫
銀給之至南昌公曰民吾民也庫朝廷之庫也誰敢
于之吾將以聞於上中貴見公不可奪乃稍自戢
時所至民被其擾獨南昌晏然雲南諸夷爭襲賄賂
公行公一切禁絕年甫六十以母老懇乞致仕以歸
而自奉有人所不能堪歸吳掃軌閉門客至則清話
終日澹如也居官所至能舉其職而南昌之政尤偉

雲南提刑按察司按察使張公憲臣墓志銘

王世貞

故雲南按察使張公以萬曆元年五月卒公諱憲臣
字欽伯其先晉陵人有贅於崑山者遂家焉世世力
田孝弟至公父府君洪有隱德嘗之嘉定得遺金數
餅為迂歸以俟亡金者授之金即馳去一日輟耕壟
上有相者過而指府君曰是夫當顯顯乃以子故府
君笑曰吾家世農安所取顯耶公時為兒從傍聞之
竊沾沾喜就里塾師吾伊不絕矣公業成為諸生久
次其成薦復偃蹇南宮試者久之而能不以戚欣見

貌益砥節於學由進士謁選得南昌令人或虞公寬大不任劇曰令可拜跽槁也且倖相地何以處之時南昌饒積牘數倍他縣而黠吏欲以事嘗公則爭操牘緩急雜而進之公第行其急者而抵緩者地曰胡足溷乃公也後不以序進立拱汝矣吏咸吐舌稱伏神明邑事大治進地時中大盜公出循行鄉落見長老間所苦人人自喜謂張公全活我又清狴犴之宿稱冤者十餘即摯擊無以難也公胡髯腹便便造請臺省諸公間亦不廢諸公日益賢重公曰得數張令吾曹不安枕耶而有段御史某者勢張甚一日顧

公語縣羨金若干吾欲有所餽謂倖相也公徐曰縣無羨也御史怒謂南昌令不奉檄覽訊謀而稱無羨公前謝曰此乃三殿工羨也縣不敢置他羨御史益怒詬詈不絕公起自如御史以巡按滿黃緣監軍事再上疏有所推薦不及公而公益以治理流聞即倖相亦語人張令似不識吾家家亦不識張令無何倖相與御史後先敗而公用卓異召拜工科給事中即上疏四事平賦役修水利重守巡謹隄防公故家東南於東南計尤切時方修虜備公謂即武庫甲仗將士司命奈何一切屬中官宜付外給事御史得覈之

又謂兩畿試不宜諉司訓老生能失士咸報可公自
吏科右給事遷刑科左持節封唐山王克正使給事
中之得正為使自公始也還晉戶科都給事中三上
疏論國漕大計下所司行之公自起小官驟貴重然
恂其益務為恭謹不以白簡故加朝紳色而其於國
家計尤忠眷有指樹數馬風諸公卿翕然稱之至出
為浙江右叅政相驚謂曰張公長者胡遽離瑣闥也
公於職分守金衢嚴三郡嘗乎礦寇大將軍用師門
多倚義烏人而義烏人益驕橫竊相從剽攻推埋不
休公錄其豪以自隨而餼之躬為訓練成師曰子去
盜而為縣官用抑何貴也建德學宮燬公捐奉以先
之蓋學成而諸生有膺薦者矣公為叅政三歲始遷
雲南按察使垂入境黔國公橫而欲用故事責三司
苛禮公使人語之曰公安得稱故事夫豈昔日黔公
也望金馬門若九天上而欲輕加其從臣乎尋謂其
僚曰禮如是足矣尋甸土酋沒而其妻安攝而移欲
得四川酋某夫之公獨曰安攝而私其土之人固恒
今不虞失土耶毋亦奸人詐為謀以構難乎勿許便
俄詐露竟知非安意也公在諫垣日以推轂賢士大
夫為主然不欲使知之而其所繩紕絕少怕曰吾奈

何以耳語輕折天下材顧獨劾一都御史苛暴好殺
會有奧主得不罷而都御史驟遷至八座與相而握
銓者比遂因上計誣斥公歸公聞命之後日即行滇
以饒貨甲天下公無所攜顧獨拔士之官滇而不能
歸者悉傳置之人謂公即廉奈何借他人裝而重我
行李也公笑不答當是時田峻市叟咸喜得一當公
為壽至詞翰之社雀躍思御而竟病痲矣痲一歲省
可能起行忽病瘤潰不止久之卒年六十有二耳公
為人寬仁恭儉出天性即所造請母論其可者其不
可者亦納然不欲見口也所推遜亡論豪長輩即兒
稚惟恐其失之也五六歲喜為詩至老而吟灑不倦
雍容和平得大曆貞元遺旨然不欲為人出之間有
能舉公詩者輒面赤囁嚅欲避去以故其詩存者千
餘首奏議公移雜文若干卷鐫之笥而行者僅紀游
二稿而已王元美曰張公之為長者乃爾吾聞之
明興崑有王君良事 高帝為陝西按察使 高皇
帝揭其名於殿楣而目之敦厚其所為長者狀非一
今乃併張公二矣其官同其祿壽不配德又同世無
有能名王君者如張公可以暝矣

雲南按察司副使徐公觀傳

徐觀字大賓其先世有自滁州來為姑孰守者因家焉遂為當塗人祖義由明經舉任巡檢觀年踰志學從師受易克自刮磨以底學成領鄉薦年方十九乙未曾試中副榜授山東齊河縣學訓導以內艱去任服闋調江西武寧縣學訓導人才多所造就秩滿使翰林院校其績學皆優超陞刑科給事中駁覆奏章糾劾姦惡無所顧避嘗奉命檢封番舶巡視邊陲所在有聲正統初刑部尚書魏源薦觀擢雲南按察司僉事至則辯冤獄別廉貪一以平恕施之上下悅服

稱有古憲臣風時麓川小夷負固拒命詔興師討之
觀佐元戎深入賊境督糧餉規籌策賊寇以平陞本
司副使餘孽煽惑乃於要害處築城堡濬溝池以備
不虞且為墾荒田俾軍耕守復招還夷落被賊虜掠
者數百人為嚮道又畫通南牙山道路以進討由是
邊患永息會按察使缺守臣率衆相與奏觀補之而
觀進表卒于金陵之新河享年五十有六

雲南按察司副使陳公政傳

黃佐

陳政字宣之番禺人生而秀穎六月能言三四齡時
客有以三人聚話命之對者應聲曰四皓同遊客大
奇之十五能文詞有理致作自訟文以警勵提學僉
事彭琉見之曰此殆潛心孔孟者也亟稱之正統辛
酉發解第一卒業太學祭酒李時勉命與商輅等四
十八人讀書于尊經閣下登景泰甲戌進士選為翰
林庶吉士與修寰宇通志書成拜湖廣道監察御史
繩愆糾謬務存大體嘗疏敬天勤民十事人服其敢
言尋奉璽書提督北直隸學校立教條十五事設簿

書以稽學者勤惰隨其資質高下而成就之大都以
德行為本文藝為末未嘗輕易棄人故學者咸懷其
德閱九載郡邑諸生交章奏保特陞山東按察司副
使提督學校如故蓋前此所未有也先是積歲糧餉
不敷庠序廩米折半支鈔奏言京師首善之地當以
培養人才為先不宜吝惜小費詔復舊典士益激昂
久之太常卿員缺吏部侍郎尹旻召飲指案間犀帶
示意政對曰腰金恒愧非據敢溢涯分乎旻遽曰君
言是也遂不果用成化丁亥上疏謂追崇孔子謂當
易大成之號以洗胡元之陋復玄聖之稱以正宋人
避諱之失用示一代崇道盛典會議者加詆斥寢其
疏不行是歲改雲南按察司副使至則繩武弁之尤
無良者數人修舉憲度張弛有道民夷安之甲午獻
績之京至湖湘邁疾還番禺治療逾二載卒年五十
有九政為人資性淳雅學殖該博存心忠厚不言人
過孝友信義之聲洽于鄉黨廣之薦紳謂可以託妻
寄子者政一人而已

論曰成化末建議者請尊孔子為廣運帝盡去舊號
朝旨不行然不以為非夫孔子之聖固無待於追崇
然所謂洗胡元之陋正宋人避諱之失則正名意也

獻徵錄
卷之二
四
肅
詆斥之逢豈其命歟先大父長樂府君稱陳憲副之
賢不容口且曰吾從之遊最久溫乎其外粹乎其中
表裏渾然猶一日也長於自修而短於徼名故或毀
方而瓦合噫紀之獻夏之璜既擯且瘞猶輝於斗極
君子豈能自掩其善哉記不云乎苟有其言必聞其
聲苟有其車必見其式

雲南按察司副使陳公騏傳

黃佐

陳騏字夢祥南海人少喜技藝工畫能醫有司羅為
醫生使視重囚入獄中穢不能忍恥之乃學舉子業
為邑庠生時年二十七矣三十一舉于鄉連登進士
拜大理寺評事晉左寺副修撰羅倫以剛許之陞江
西僉事發奸搃伏不能名分巡嶺北民病瘴以藥活
之者至八百餘人勘虛糧明經界均徭役民不敢欺
有病死而歸以被踢殺告者騏視而折之曰傷必有
血蔭今肋骨形彎內黑外彼能自內踢耶煮皂角水
洗之黑色盡去獄遂決人服其明巡九江以南火燬

學宮文昌祠凡清出虛糧十八萬三千餘石儲贖罪
穀備賑濟至二十一萬六千石有奇以各道罰罪銀
市材倩工修理學校祭器及正聖賢像服之不如制
者七十八所毀淫祠九十七區百姓以陳打鬼呼之
陞雲南副使時鎮守太監錢能家人不法每為騏所
制中傷之遂訔奏落職家居年八十餘卒騏性勁厲
自許晚年論名理與張詡論不協著鳶魚辯原學諸
篇蓋亦自有所得云

月山叢談騏為江西僉憲初至夢有一虎帶三矢登
其舟覺而異會按問吉安一女子謀殺親夫事有疑
初女子許嫁庠生女富而夫貧女家恒周給之其夫
感激每告其窻友周彪彪家亦富嘗聞其女之美而
欲求婚後貧士親迎時彪與偕行諺謂之伴郎途中
貧士遇盜殺死從行者皆驚散而貧士之父疑女家
嫌其貧使人故要於路謀殺其子意欲他適殊不知
乃彪所謀欲得其女也遂訟於官問者不察因按女
有姦而謀殺夫騏取貧士之父問之云女與人有姦
不得其主名使隱婆驗其女又處子乃謂其父曰爾
子在學交與誰最密曰有周彪者騏因思曰虎帶三
矢而登舟非周彪乎况彪又伴其親迎夢為是矣越

數日偽移檄下吉安取有學之士修郡志而彪之名
在焉既至驥飲之酒半獨召彪後堂屏左右引彪手
歎息陽謂之曰人言爾殺貧士將娶其妻吾憐汝有
學且此獄一成不可復反異汝當吐實勿欺吾則救
汝彪錯愕戰慄即跪而悉陳之驥錄其詞潛令人捕
同謀者一訊而獄成一郡驚以為神驥為人慷慨多
大節羅一峰詩云舉世皆婦人惟公獨男子其人可
知矣後遷雲南憲副竟以繩監軍失官今詩卷尚藏
其家或謂此為牟俸胡僉憲事非

中憲大夫雲南按察司副使朱君文墓碑

李東陽

君姓朱氏諱文字天昭一字天章其先世本毫人系
出唐孝友先生仁軌五代時遷睢陽宋有諱貫者官
兵部郎中致仕與杜祁公輩為五老會繪像為卷至
今存焉五傳至直秘閣子榮徙常熟生實錄院修撰
大有再徙吳又三傳至征東儒學提舉德潤世所稱
存復先生者為君高祖曾祖吉避地崑山入國朝為
戶科給事中 高皇帝旌其直言賜以錦綺後改中
書舍人遷湖廣按察司僉事 太宗朝復召為中書

舍人祖諱永安隱弗仕考諱夏居鄉授徒以君貴贈
監察御史妣鄭氏贈孺人君少入蘇州府學為諸生
有名初業詩旋改春秋再改易成化丁酉舉鄉薦甲
辰擢進士高第連遭二親喪弘治己酉服闋簡入都
察院理刑庚戌授雲南道監察御史承勅稽廣東西
軍籍兼諸司卷牘乙卯巡按福建己未擢湖廣按察
副使專督屯田水利巡按意有所屬君持不下會署
歲考見謂為治事遲緩例當調用需闕不時得君已
無仕進意命亦不及越三年乃改授雲南君上疏請
老遂不復出其子希周以弘治丙辰狀元及第歷翰

林修撰遷侍讀當被封勅例進中憲大夫正德辛未
三月二十八日卒年六十八其生則正統甲子八月
二十三日也君贅于吳之王氏封恭人子六人希周
最長君性敏而慎言動不苟居官持大體審而能斷
博羅軍陸氏妄指鄉人二昆弟為族而資其費不得
又誣其為故軍陳盧二氏子從祖以無嗣養為子今
二氏顧絕當各還本役君折之白無嗣而養子安用
二人二人者又豈適皆絕軍之後哉其人乃服閩民
有製海船者海商以通外國巡按論商死民當謫戍
都察院欲并坐死君疏謂例以擅造大船載違禁貨

物入番市易者處以極刑今民未嘗入番船又非商
所造不當各坐乃皆從末減巴陵有率諸子及母弟
之子共毆殺其異母弟者既皆論死乃誣其弟嘗通
子婦為子所詬因惡其玷而毆之於是弟之子亦坐
死君曰律罵父者須親告乃坐伯殺其父則讐人也
豈可遽以為信立命釋之凡此類聞者皆為一快也
如均龍溪南靖佃法革沙尤水驛夫船減延津二府
餽運浮費增湖廣陂堰令屯田隱匿自首而籍其久
業者雖皆州縣事督令區畫悉君手出而名之曰遲
緩豈有情哉今希周以文行嚮用于時君子曰固于
是乎在

雲南按察司副使朱公文墓志銘 王 鏊

朱之先系出唐孝友先生仁軌宋有兵部郎中貫與
丞相杜祁公遊所謂睢陽五老者也五傳至直秘閣
子榮稚年遭亂南奔始家吳之常熟直閣生實錄院
修撰大有徙家吳城又三世為征東儒學提舉德潤
有盛名于元是為公之高祖曾祖吉戶科給事中以
直言被旌遷湖廣按察司僉事召為中書舍人始徙
崑山祖永安考夏皆隱居教授考以公貴贈監察御
史公諱文字天昭自幼超穎廻出輩流游郡庠部使

者程校藝業輒為首冠舉于鄉輒不利成化丁酉年三十有二始占南畿鄉試甲辰登進士第公初治詩已乃改治春秋又改治易治易未三年遂登第士流服其敏弘治庚戌授雲南道監察御史出按兩廣戎籍凡理戎籍例以搜括隱隱多寡為殿最蒞其任者率以酷烈為名公在兩廣獨持平不苛而稽審有法民一言出口洞燭顛末雖斷歸戎籍退無怨言巡按福建風裁整肅衆謂得御史體魏都御史富林副使俊移疾家居咸奏起之時公私殫屈國計無所出而鎮守死者貨財鉅萬輒既于羣小會福建鎮守陳道死公乃籍其數以聞冀可佐公帑之乏詔不從是後鎮守死御史不得復預權貴者始忌之屯田故有額而隱占于奸氓歲久漫不可考公至湖廣則許民自首不究切之或得業已久則輸稅而不奪其業民見公明信率詣官首實公為政雖若嚴峻而每出于平恕閩有吳甲治海船商乙以市外番咸坐死公曰甲造舟而未嘗市番乙市番而舟非所製得減死其他寃獄尤多所平反政聲流聞法當遷秩上官有不悅者署其考為才力不及久之改雲南公曰尚可仕乎遂上疏乞致仕時國法方峻人為公危之公不顧卒

俞旨居官幾三十年公私無纖毫過權門要雖路舊
與連未嘗一言自通人有德公者寓書當道薦進公
知之即還其書不荅曰吾豈可自售也尤善論古今
成敗能以辯博濟其議往往屈人于廣坐之中予與
交幾四十年偉其博重其廉且守而獨疑其過于警
拔不虞乃以不及沮于時銓鑒者其獨謂何物論所
以至今不厭也公以正德六年三月二十八日卒春
秋六十有八子男六長希周賜第一甲第一人及第
今為翰林侍讀以學行聞于時

雲南按察司副使賀公元忠墓志銘

王 鏊

雲南按察副使賀公諱元忠字澤民其先自宋南渡
來家吳包山之陽曾祖孟安祖文昌世有隱德孝廉
以易學魁應天解試歷官九江學訓福建按察知事
以剛直不能隨時告歸授徒吳中今吳中易學最盛
其淵源蓋有自云公得家學之秘成化辛酉占解試
高等壬辰登進士授行人司行人擢江西道監察御
史巡視漕河河道為通出按廣西風裁凜然剔奸振
滯黜汚崇良名聲大振當道者多才之而亦有不悅

者乃除河南按察司僉事以憂去改僉雲南按察司
撫夷勦寇改著勲績鎮守黔國公巡撫巡按僉舉公
資望不當尚滯卑官遂進按察副兵使備金齒騰衝
時木邦孟養舉兵相攻系歲不解公躬冒嵐瘴諭以
威德事且就緒而固以病乞歸矣帳下千人以金贖
不受夷人為作卻金亭以旌其廉云公歸林下凡二
十四年歲乙丑 詔進亞中大夫正德丙子八月以
疾卒春秋七十有八公為人操執堅定面目嚴冷在
道時獨持憲紀輩類御史抑首媿媿不敢出一語親
舊或有囑則厲聲曰吾知有 國法不知有他他日

卻金亭

有言言事當有跡則又厲聲曰御史以風聞言事必
瑛發而後舉則焉用御史為家居久矣雖子弟不敢
媒見泰以御史按閩中還侍立左右惴惴如也近世
仕者多崇第宅廣田園以侈相高公少能以其家富
迄老所居狹隘卑陋終不肯覆一瓦憎一塵曰無為
子孫累也冠服敝舊飲饌菲薄能甘之雖宴享賓客
亦不肯隨俗奢靡值伎樂必望望然去之出入坐一
小航人不知其嘗有官也於乎其可謂篤於自信不
為流俗所變者耶

雲南提學副使孫公繼芳傳

孫繼芳字世真華容人正德辛未進士初為刑部山西司主事是時宦官勢盛東廠獲數人誣以為盜下刑部論尚書命繼芳治之鞫知其寃也即白書尚曰此人審非盜可寃平民哉尚書命白東廠亦無能奪也卒出數人御史張璞劉天和王廷相迂宦官逮繫獄疏救不報因謝病歸起改兵部車駕司主事陞職方司員外郎 毅皇將南巡武選郎黃鞏與繼芳百餘人諫止 上大怒咸廷咎之繼芳得不死尋改職方掌軍國機務及諸邊鎮籌畫故謂繁重繼芳日談

笑為之至奏草時命吏執筆旁立顧口占以書然亦
咸明切引繩墨中事情未幾與部尚書事相牴牾外
補雲南提學副使卒誣摘黜之歸繼芳性慷慨激亢
當其氣所欲言雖萬乘勿畏也其為提學雲南時數
以事與都御史御史爭都御史御史亦降意溫言解
之嘗為諸生受學何景明為舉子亦遊其門故其文
尚典實叙述紀載有班氏風所傳詩僅百餘篇皆精
語惜任直過當遭時排抑然海內豪傑至今尚多知
之

雲南按察司副使申公綸墓志銘 連 鑲

公諱綸字廷言姓申氏別號南濱其先山西屯留人
元季有諱文美者徙居絳縣留孟里國朝洪武中其
子庸舉文學為絳學教諭進山東掖縣知縣嘗過廣
平之永年慕其山水之秀遂占籍為永年人即公之
高祖也曾祖諱達永樂初以人材徵授禮部主事擢
汝寧知府祖諱寧 宣宗朝舉賢良方正考諱廣自
郡掾拜蓬萊典史陞靈壁主簿生平為人仁厚與物
無忤前妣王氏生紀妣岳氏生公及緒及縉公自幼
聰穎出羣嗜學問弱冠補郡庠弟子員益力於學弘


治戊午領京闈鄉薦乙丑登進士第正德丙寅授山西定襄知縣隨丁外艱己巳改浙江永康復丁內艱壬申服闋改山西平陸平陸地僻民頑素稱難治公推誠愛民刻宿弊崇寬政鋤強植善興學諭俗均徭薄賦甫歲餘政平訟息部使者交薦其賢甲戌銓曹以政優調公太原去之日餞送者數千人老幼流涕有卧轍不忍舍去者太原民悍俗野刁風素熾公下車明法持平風采凜凜健訟者送息不改月而事克就緒乙亥擢潞州知州時潞久不雨公至膏雨露足民大悅丁丑擢南京兵部武選司員外郎戊寅轉戶

部廣東司郎中歷官兩部政績偉然庚辰三載考最得 賜誥贈父如已官贈封其母妻皆宜人嘉靖改元壬午擢河南衛輝知府至是才識益老練在衛不勞而治甲申河南諸郡飛蝗蔽天民多患之獨蝗不入境禾生六穗歲大熟士夫各贈以詩有無冤清漢獄多稼頌周田之句由是撫按使臣章交疏公治行為中州第一乙酉冬述職京師而改調常州之命下矣明年丙戌朝會吏部推郡守治行草異者請加宴賚公首與焉至常益以廉慎視身嚴明蒞政一時豪右斂手避之其政之孚若移風清訟禱雨應耘散穀

賑貧詰奸弭盜與作書院新學宮審繫囚簡養濟式
文演武之數表表可述丁亥擢四川按察司副使明
年戊子至蜀時憲長缺公視篆振風采雪冤滯律姦
貪綏遠夷秉公執法敷恩著威凡所建白鑿鑿如也
偶因議事與按臣不合適己丑大朝考遂以才力不
及解任自是家居數載無復仕進意辛卯夏入京欲
上疏乞致仕不果遂補雲南曲靖等處兵備然意不
欲久居也會明年壬辰大朝得以年老致仕見邸報
脫然歎曰吾年六十有三得生還鄉井足矣抵家躬
於滄河之陽因舊築構室四楹扁曰南濱草堂內有

嘉木數種修竹萬竿足以供清玩勝日角巾野服招
致騷人墨客相與徜徉其間又倡士夫故老效古人
為真率會月舉歲週以頤養天和郡舉鄉飲必敦請
以為上賓吾廣平宦族雖多求其功成身退當達尊
之榮享林泉之樂好古執禮為時推重如公者蓋不
多見人皆卜以遐筭孰意末疾一邁竟至不起哉公
生於成化庚寅春秋六十有九嘉靖初詔下均田之
事郡守湘源蔣公忻然舉之事雖善政而間為豪貴
多田者阻抑公獨奮然堅主不避訕謗後郡守又欲
建通水惠民二閘泄壅沃槁然畚鍤之勞民滋不悅

也公亦委曲詳盡道其便益梗槩以贊襄之事卒得
濟其隱德之及民其類如此



H930.1
2009

